



Josefina Dal Farra-Berther

28.6.1942 - 12.5.2001

Ils 18 da matg 2001 havein nus satrau nossa cara Josefina Dal Farra-Berther sil santeri da Rüschlikon. Lunsch naven da sia patria. Quei vul denton buca dir ch'ella sefutravi da sia patria. Il cuntrari ei il cass. Malgrad ch'ella era pressapauc 30 onns egl jester haveva ella fetg bien contact cun siu vitg nativ Camischolas, gie ins sa dir cun l'entira vischnaunca.

Igl emprem vegneva ella cun sia famiglia reguladamein en vacanzas tiels geniturs. Cura che quels ein stai morts, ha ella surpriu ina part dalla casa paterna ed ha fatg ordlunder ina stupenta habitaziun da vacanzas. Aschia ei siu grond giavisch ius en vigur: ver zatgei agen ella patria. Inagada a Camischolas haveva ella buns contacts, specialamein culs fargliuns, denton era culs parents ed enconuschents. Bugen dev'ella in scart troccas e saveva magari schon sescaldar. Era cun sias cameratas e ses camerats dall'annada 42 vev'ella bunas relaziuns ed ella ha priu part da mintga sentupada da classa. Igl ei perquei stau ina biala gesta ch'ina gronda delegaziun ha priu part dalla sepultura. Quei pertucca era ils ulteriurs parents, amitgs ed enconuschents da Tujetsch cun lur preschientscha a Rüschlikon.

In stretg ligiom cun la patria munta il lungatg. Per l'Josefina il romontsch. Ella ha teniu ault siu lungatg mumma enten resdar romontsch culs affons Manuela e Patric, aschia ch'els san stupent quei lungatg. Quei pertucca era il consort Pasquale. Jeu sun perschuadius ch'els ein engrazieivels a lur mumma per quei agir. Jeu sperel ch'il romontsch seigi ina punt per mantener vinavon buns contacts cul Grischun, cun Tujetsch.

La patria, il lungatg mumma, dus impurtonts facturs ella veta dall'Josefina. Leutier s'audan ulterioramein siu humor, siu grond temperament, sia buna luna e siu plascher da contact. Sias qualitads las pli caracteristicas denton eran sia carezia e buontad. En emprema lingia per sia famiglia, lu denton era per ses fargliuns - entras gronda hospitalitatad - ed era per ses amitgs ed enconuschents.

Il di da sepultura ei era exteriaramein staus stgirs e trests. Alla fin dalla sepultura ha il suegl denton entschiet a sclarir, sco sch'el less dir che la mort munti per l'Josefina buca stgiradetgna, mobein glisch!

Norbert Berther